

奴才覆查無異理合陳明下商部知之  
朝陽鎮災

清實錄五月甲子奉天將軍趙爾巽奏朝陽鎮忽遭火災延燒商民並天主教堂瓦草房三千餘間業經撥款撫恤得旨著卽妥爲撫卹毋任失所

秋七月設安東大東溝海關

清實錄七月乙巳直隸總督袁世凱等奏奉省籌辦商埠擬先於安東縣大東溝設立海關並分卡暨請以東邊道兼充監督下部知之

添設法庫同江等處同知江家屯通判遼中縣知縣小三家子縣丞水門子巡檢

清實錄七月丙午盛京將軍趙爾巽奏奉省應添廳縣各治於法庫設撫民同知一員於同江口設河防同知一員於江家屯設撫民通判一員阿司牛永鎮設知縣一員名曰遼中縣距鎮安縣九十里小三家子設分防縣丞一員如所請行

東華錄七月壬寅趙爾巽奏一爲法庫門係開原縣屬境距縣一百一十里東北則通吉林正北則鄰蒙部人煙輻輳行旅絡繹轉瞬商埠一開華洋錯處交涉繁難均須隨機立應原設知縣有鞭長莫及之虞應於該處添設撫民同知一員名曰法庫門撫民同知畫開原及附近康平鐵嶺三界地方併歸管轄以資控馭而一事權一爲同江口係昌圖府屬境距府七十里扼昌開之要害據遼河之上游水陸交衝五方雜處爲北路商務



奉天通志 卷四十九  
總匯之區亦議闢爲商埠地方沿河向多馬賊狙伺劫掠在在堪虞保護巡緝責重事繁斷非原設知府所能兼顧應添設河防同知一員名曰同江廳河防同知專司交涉緝捕庶幾有所責成無虞疏懈一爲江家屯係錦州屬境距縣九十五里毗連直隸朝陽府境沿邊要隘向爲盜匪出沒之區特與縣城遠隔此擎彼竄習爲逋逃附近商民多被其害亟應於該處設官得以鎮懾彈壓銷患無形擬添設撫民通判一員名曰江家屯撫民通判畫錦縣迤西各村莊併歸管轄庶於綏邊固圉之道胥得其宜一爲阿司牛永鎮係遼陽州屬境距州一百三十里地居遼河之中與新民府接壤犬牙相錯附近各處均距治所較遠爲教化所不及以致民情頑梗盜匪潛蹤良善商民多被擾

害是宜添設知縣一員名曰遼中縣畫新民遼陽海城三處地段併歸管轄平時則宣布政教有事則嚴緝匪徒庶地方獲乂安之效一爲小三家子係鎮安縣屬境距縣九十里地居邊徼控制難周擬添設分防縣丞一員責令巡緝匪類以佐縣令之不逮一爲水門子係復州屬境距州一百二十里中隔鐵道重山複嶺亦易藏奸擬添設分防巡檢一員專司緝捕事宜以輔州牧之不逮得旨如所請行

八月設盤蛇驛裁判委員

清實錄八月戊寅盛京將軍趙爾巽奏廣寧縣屬盤蛇驛距城寫遠該處現辦墾荒地日闢戶口日增一切詞訟若仍赴縣控訴實非便民之道應先設裁判委員俾得就近審理下部知



之

九月改江家屯撫民通判爲錦西撫民通判

清實錄九月乙未朔更定奉天錦縣江家屯新添通判爲錦西撫民通判從將軍趙爾巽請也

東華錄八月戊子趙爾巽奏前於奉省應添廳縣各治派員試辦摺內奏明擬於錦縣之江家屯添設通判一員名曰江家屯撫民通判欽奉硃批著照所請吏部知道欽此當卽欽遵轉行去後茲據試辦委員同知蔣文熙稟稱業將界址會同錦縣劃定其新治地段皆在錦縣以西界限分明毫無攙雜等情前來覆查錦縣迤西地段旣已劃歸擬設之通判新治似應更名爲錦西撫民通判較爲賅括且顧名思義亦足昭核實而定服從

下吏部知之

命載振徐世昌查辦奉天事件

清實錄九月丙申命載振徐世昌前往奉天查辦事件

中日交收營口條約成

東華錄九月戊午日本歸我營口尋中日委員會訂交收營口條款一按北京所訂另單第一條載明營口地方於日本軍隊未撤以前凡關乎驗疫防疫等事應由地方官與日本領事官商訂章程等語現今兩國委員商定暫時卽按日本軍政官所訂章程辦理倘日後查有應行更改之處卽由地方官會同日本領事隨時商改俟日本軍隊撤後卽由中國地方官自行主持辦理一按北京所訂另單第二條載明凡於軍政時代內所



有業經開辦或已籌畫而未經開辦之公益事宜應由地方官接辦或允歸其承辦等語查日本軍政官前已允許日清合辦株式會社開辦營口自來水電氣車電氣燈電話四業現經兩國委員商定自來水電氣車電氣燈可由該會社承辦但須將該會社原定一切章程呈送北京應管之部立案倘該部檢查此項章程有應行更改或應添減之處該會社允為遵照辦理自來水一業添股之時必須先儘華人電話一業乃中國電報局專利應由中國電報局收回自辦即由該局與該會社彼此各派一員會同查看該會社在營口已經製備所有電話產業估價照購倘彼此委員意見不同應由該局與該會社隨時公舉一局外之公正人由伊定奪彼此遵守屠獸場一事應由衛

生局接辦至如何估價購買即照電報局承購電話方法辦理由營口至牛家屯之輕便小鐵道俟電氣鐵道工竣即行撤去凡關乎公益土木工程出於寓居該埠中外商人之同意由日本軍政官開辦或已籌畫而未經開辦者中國地方官允照接辦完工一按北京所訂另單第三條載明警察及衛生事務應歸中國地方官管理務期盡善以保公共治安為此兼用日本警察教習及醫生除薪水外一切章程均按天津雇用日本警察教習及醫生一律辦理倘日後警察衛生辦理有未盡妥洽之處一經日本領事官函告應由地方官隨時酌辦一凡軍政時代內所判斷訟事案件毋庸中國地方官再為提訊所有判斷案件並登記等一切文卷應由軍政官移交地方官存案此



奉天通志 卷四十九  
四十五  
項案卷另由軍政官備繕一分移存駐紮營口日本領事署一  
按北京所訂另單第四條載明海鈔兩關事務應歸海關道管  
理清國政府將該兩關進款暫儲存於正金銀行將來戶部銀  
行分別開設之後於兩國銀行儲存等語現經兩國委員商定  
稅款於中國度支部銀行未設以前儲存營口正金銀行如何  
辦法應由該管之地方官與正金銀行彼此議定一營口日本  
軍政准定於明治三十九年十二月一日即光緒三十二年十  
月十六日全行撤去

冬十月設奉天旗員仕學館

清實錄十月丁卯奉天將軍趙爾巽奏專設旗員仕學館以造  
吏才下部議奏

東華錄十月辛未趙爾巽奏我朝肇興東土一統中原文治武  
功越邁前古而其時從龍碩彥附鳳親賢無一非鎬京世祿之  
臣豐沛故鄉之士迨後名臣良將踵武代興以開國論固駸駸  
乎以一隅才俊宰治天下而有餘即累葉以來八旗人才亦嘗  
占優勝之地位初不料沿至今日而國家發祥所在人才之不  
振如斯奴才到任以後五部雖即裁撤而應辦地方事宜及各  
項新政需才正亟當令各旗員分班進見詳細諮詢其中心地  
明白能達事理者卒鮮其人及分試以事又多茫無所措其稍  
有條理者已屬罕覯推原其故材俊之士多半在京外服官其  
次者皆由原設之各旗衙門官多事簡以致優游閒散消沮英  
華將欲回復其本能非藉教育之力不可查奉省前設仕學館



奉天通志 卷四十九  
一所本屬不分滿漢一體肄業奈限於學舍學額收容無多因令另設一旗員仕學館專教旗員所有實缺候補及在籍各員凡文理粗通不沾嗜好者均准考送入館肆習購置儀器圖書延聘中東教習分授公法私法刑法民法政治理財商法地理歷史兵略體操東文各科以六箇月爲一學期滿四學期爲畢業移會盛京副都統多文督辦該館事宜另遴派協領二員會辦隨同經理已於本年七月初八日開館學員之額暫定八十八名俟法政學堂擴充後再擬歸併冀從此觀摩陶鑄養成通才庶可因材器使惟興學之初若不預懸獎勵於後殊不足以鼓舞中材查直隸奏定法政學堂獎勵畢業學生章程其一二三等各分別獎以繁簡各缺及要差四等者府道二班臨時另議

給獎等因奉省旗員仕學館與直隸法政學堂事同一律惟旗員官階職掌與地方官不同且陪京重地卽稍加優異似於國家矚顧梓桑振興治理之道不無裨益相應援案籲懇天恩俯准將畢業生之考績最優等者由奴才奏保應升官階其次優等者分別派充重要差缺如蒙俞允請先行飭部立案施行至需用經費應請於稅捐項下動用作正開銷下學部議奏  
添設莊河廳同知巡檢盤山廳通判本溪縣知縣柳河縣巡檢裁盤蛇驛總管東西兩界官

清實錄十月辛卯添設奉天省莊河廳撫民同知莊河廳石城島巡檢盤山廳撫民通判本溪縣知縣柳河縣樣子哨巡檢各一員裁盤蛇驛總管東西兩界官各一員從將軍趙爾巽請也



十一月度支部分設銀行於營口

東華錄十一月癸丑度支部奏請於奉天營口分設銀行允之  
三十三年春二月設馬蘭屯蒙古學堂昌圖蒙漢小學堂

奏稿二月丁亥趙爾巽奏博多勒噶台親王旗護理扎薩克印  
務台吉烏勒吉等呈請在該旗界內馬蘭屯創設蒙古學堂一  
所名曰和碩博多勒噶台親旗王官學堂悉由本旗考選復於  
昌圖府城外創設高初兩等小學堂一所名曰科爾沁左翼三  
旗蒙漢小學堂除考選本旗子弟並知會達爾罕賓圖兩王旗  
選送外凡昌圖民籍子弟有願入堂肄業者亦一體考選等語  
奉硃批著照所請學部知道

三月添設乾安鎮分防照磨達都牛永分防縣丞各一員

清實錄三月丙申添設奉天洮南府乾安鎮分防照磨遼中縣  
達都牛永分防縣丞並分別鑄給印信鈐記從將軍趙爾巽請  
也

奏稿三月辛丑趙爾巽奏洮南府屬西北之乾安鎮距府二百  
五十里爲展放扎薩克圖蒙荒地地段府治相距過遠實有鞭長  
莫及之虞應於該鎮添設照磨一員名曰洮南府乾安鎮分防  
照磨援照昌圖府八面城照磨之例定爲治邊要缺又新設遼  
中縣屬之達都牛永本係新民府舊治自劃歸遼中縣後該處  
紳民仍以距縣寫遠爲辭應卽派設縣丞一員名曰遼中縣達  
都牛永分防縣丞凡達都牛永附近一帶之毗連新民府轄境  
撥歸遼中縣管理



改盛京將軍爲東三省總督增設奉天巡撫以徐世昌爲東三省總督唐紹儀爲奉天巡撫以趙爾巽爲四川總督

清實錄三月己亥諭內閣東三省吏治因循民生困苦亟應認真整頓以除積弊而專責成盛京將軍著改爲東三省總督兼管三省將軍事務隨時分駐三省行臺奉天吉林黑龍江各設巡撫一缺以資治理徐世昌著補授東三省總督兼管三省將軍事務並授爲欽差大臣奉天巡撫著唐紹儀補授

東華錄同

東華錄三月壬子以趙爾巽爲四川總督

日俄戰紀三十年十月十五日鄂督張制軍洞之近以滿洲善洞後策奏陳大意六條一改革東三省官制設總督巡撫布政使按察使道台及州縣等官職二訓練常備軍及後備軍三施行

警察制度四增設通商口岸五設奉天國家銀行發行鈔票六設立木植公司

撥陸軍第三鎮等軍赴防奉天

清實錄三月戊申東三省總督徐世昌奏請將陸軍第三鎮全隊撥赴東省再於第六鎮及二四五鎮內抽撥步礮馬各隊立混成兩協令赴東省填紮外兵撤退地面均歸總督節制調遣以重邊衛從之

添鑄欽差大臣關防東三省將軍印信

清實錄三月戊申添鑄欽差大臣關防東三省將軍印信從總督徐世昌請也

又四月壬午直隸總督袁世凱奏遵旨酌由陸軍二四兩鎮內



抽出撥混成一協移東三省餉項暫用原款由直隸咨解俟一年後責成該省自行籌付騰餉補練軍隊允之

改鑄盛京三陵衙門圖記

清實錄三月己酉改鑄盛京三陵衙門戶司禮司工司五品官工司六品官圖記各一顆從將軍趙爾巽請也

夏四月丈放奉省各屬荒地

清實錄四月丙寅新調四川總督署盛京將軍趙爾巽奏丈放鳳凰廳等屬葦塘河淤山荒各地擬定章程二十五條勘放圖什業圖蒙荒各地酌擬變通章程十三條清丈彰武縣及養息牧試墾續墾各地擬辦章程十條其養息牧原設總管界官並請裁撤下部知之

奏稿四月辛未趙爾巽奏鳳凰廳屬之北井子黃土坎岫岩州屬之大孤山青堆子安東縣屬之柳林子柞木山等處約計葦塘十餘萬畝明灘十餘萬畝此外該三屬及寬甸縣沿海沿江一帶水退河淤以及山荒各地一經培養或宜稼穡或宜蠶桑尙不計其數

又四月癸酉趙爾巽奏彰武縣屬全境地畝本係牧放官牛羊廠甸嗣於光緒二十三年間放出生熟荒地六十餘萬畝原丈底冊因亂遺失勢非覆丈斷難澈底查清又養息牧地自嘉慶年間開放試墾續墾分爲東西兩界設總管一員界官二員迭遭變亂徵冊遺失該處與彰武地畝毗連正可併案勘丈又四月癸酉趙爾巽奏前遵諭旨籌辦蒙荒派員勸商圖什業



圖親王旗允撥界內荒地北自茂改吐山起南至得力四台止計南北長三百六十里東西寬四十里嗣另派員與該旗協理印務德力克呢瑪等晤商允展放茂改吐山西北之呵力加拉夏一帶荒地南北長六十里東西寬四十里

命奉天巡撫加副都統銜

東華錄同

### 定東三省官制

清實錄四月辛未東三省官制擬各建行省公署以總督爲長官巡撫爲次官設二廳曰承宣諮議以左右參贊領之設七司曰交涉旗務民政提學度支勸業蒙務以司使領之另設督練

處以擔軍政提法使以理刑法並擬督撫辦事要綱六條其詳細及變通章程隨時奏明辦理從之

東華錄四月甲戌徐世昌等奏伏查欽定歷代職官表指明督撫爲行部盛京將軍原兼兵部尙書右都御史亦有部院之稱與晉唐都督府分設長史司馬各曹參軍及英之澳洲美之各省於總督府分設財政學務等官者相合擬於奉天吉林黑龍江三省每省各設行省公署以總督爲長官巡撫爲次官皆如各部堂官於行省公署內分設二廳一曰承宣廳稟承督撫掌一切機要總匯考覈用人各事一曰諮議廳掌議定法令章制各事就原有局署酌量歸併分設七司一曰交涉二曰旗務三曰民政四曰提學五曰度支六曰勸業七曰蒙務仿國初將軍



設參贊及出使大臣參贊之例設左右參贊各一員分領承宣  
諮議兩廳事務交涉等七司各設司使一員總辦司事承宣廳  
及各司均設分科每科設僉事及一二三等科員佐之諮議廳  
不設官缺酌派議員副議員顧問員額外議員皆選明達政治  
者充之以資研究此外陸軍關係綦重應另設督練處以擴軍  
政司法分權宜豫擬專設提法使以理刑法其官制另由臣等  
詳議具奏得旨如所議行

五月免奉省開礦出井各稅

清實錄五月癸卯新授四川總督署盛京將軍趙爾巽奏南洋  
華商來奉開礦請免出井各稅以示招徠下部知之

東華錄五月丙午趙爾巽奏奉省處商業競爭之時本地既無

大貨本家而備值又復昂貴是以興創各事任呼罔應商界實  
無以自存欽奉迭次諭旨招徠華商回國飭加保護仰見慈惠  
之懷無遠弗屆莫名欽感因思南洋諸島富商大賈居多距離  
不遠若能招致前來實可爲商民實邊之一助查有前廣東惠  
潮嘉道沈守廉服官粵南素爲移民信服特委前往新嘉坡檳  
榔嶼一帶勸諭各商許以特別優待各島華商習知奉省爲農  
工商業產地皆願集貲自效由商會公舉代表職商熊其實朱  
晴溪來奉調查並呈遞辦事節略前來接見該商皆有熱心實  
力當加獎勵詳閱節略於官爲保護一層再三致意蓋猶有疑  
懼之念存至開礦一層先請隨便探礦看定之後再行請領執  
照又礦稅請免出井悉照統捐辦理等節雖與定章稍有不同



惟查南洋華商屢經招徠至今裹足不前者實緣憚本國文法之煩多官吏之更易又兼生長外洋不習本國風氣若非示以簡易之趨優其保護之法斷不能堅其信從且恐前者失意而歸後者永遠相戒於朝廷一視同仁之意地方興殖之策皆有關係此次經沈守廉竭力勸導又得新嘉坡領事孫士鼎相助招致始得公舉二人來奉實爲奉省實業發達之初基默計招徠不易非許之始終保護不足信其心非准其稍示通融無以鼓其氣況所請各節皆損小而益大爰一一批准照辦以期信倚而廣招徠據農工商局礦政調查局稟請前來相應據情請旨飭部立案施行除咨部並移交新任督撫臣接洽外謹合陳明下部知之

定考試舉貢中額奉天五名

清實錄五月丙午禮部以考試各省舉貢中額請得旨滿洲取中十名蒙古取中五名漢軍取中七名奉天取中五名

六月頒鑄奉天各廳司印信

清實錄六月甲子頒鑄奉天承宣諮議廳提法司各印信從東三省總督徐世昌請也

撥奉天槍彈

清實錄六月甲申撥北洋扣留德商夏利曼槍七千八百桿隨帶子彈交東三省軍營備用

秋七月設奉天文報局

清實錄七月甲寅東三省總督徐世昌奏奉省設立文報局原



設驛站概行裁撤以節經費下部知之

奏稿七月丁巳徐世昌奏奉省原設二十九驛共計驛丞二十九員驛丁四千四百名額馬一千一百七十四匹現在存馬二百一十六匹缺額九百五十八匹每年應領馬乾實銀一萬五千五百八十兩八錢買補馬價實銀二千五百三十四兩四錢現既設立文報總分各局此項驛站直同虛設自應全行裁撤九月擬定奉天審檢兩廳官制

清實錄九月辛卯東三省總督徐世昌奏酌擬奉天提法司及各級審判廳檢查廳官制職掌員缺品位下所司議東華錄七月辛卯法部奏前月二十七日欽奉上諭各省審判廳著東三省先行開辦

諭各省設立諮議局

光緒政要<sup>三十一</sup>九月諭前經降旨於京師設立資政院但各省亦應有博取輿論之所著各省督撫均在省會速立諮議局凡地方應革事宜議員公同集議候本省大吏裁奪施行

冬十月改築京奉鐵路

清實錄十月壬戌郵傳部奏接收新奉鐵路及增改工程籌撥款項報聞

東華錄十月壬戌郵傳部奏奉天至新民屯鐵路前由日本築造光緒三十一年十一月中日全權大臣會議由中國備價收回本年三月間外務部與日本使臣訂立合同奏明該路售價日金一百六十六萬元由津榆鐵路餘利項下籌撥在案臣部



奉天通志 卷四十九  
接准行知當由京奉鐵路餘利項下提付日金一百六十六萬元於三月十二日交日本使臣林權助收訖一面派京奉鐵路總辦道員周長齡等辦理接收事宜於四月二十一日按照日使交來清單將全路約一百二十里暨車輛材料器具點驗清訖自是關內外全綫由京師直達奉天兩京同軌悉慶蕩平當由臣部奏請將該路定名京奉仍飭周長齡等兼管在案查該路縮轂要衝於軍事實業諸端關係至爲切要今既收回自辦亟應改良盡善以期便利轉輸該路當日築造時本爲行軍而設工程既不合宜材料亦多窳劣其鐵軌距離較京新舊綫尙狹一尺二寸彼此車輛不能聯接必須展寬軌道方便交通而遼河木橋長約一千九百餘尺尤須改造鐵路以免危險其餘

工程材料亟須添改之處尙多查看全路情形幾須全行改築經飭總工程局等切實估計約須銀元一百九十餘萬元臣等詳加覆核均屬實在要需自應預行籌備仍飭分期領用樽節開支惟臣部現無存款該路所需一百九十餘萬元除遼河以東工款照外務部所訂接收該路合同應向日本籌借一半現議借銀元四十萬元外其餘一百五十餘萬元擬卽由京奉餘利項下分年撥付以資挹注而重路工綜計全路增改工程約明年夏秋可以完竣現就原路急加修理業於五月十九日由京至奉全路通車一面趕辦增改工程庶剋日程工籍副朝廷興業便民之至意報聞

十二月設東三省練兵處



清實錄十二月丁卯東三省總督徐世昌等奏議設東三省練兵處彙陳試辦章程如所請行

設奉天各級審判廳

光緒政要三十二月徐世昌唐紹儀奏先於奉天省城設立高等審判廳一廳於奉天府設立地方審判廳一廳於承德興仁兩縣地方按巡警區域分設初級審判廳六廳各廳均附屬檢察廳俟辦有成效再行逐漸推廣於十二月初一日一律開辦

三十四年春二月添鑄奉省各級審檢廳印

清實錄二月壬午添鑄奉天省城各級審判檢察廳印信從東三省總督徐世昌等請也

奏稿二月辛酉徐世昌奏現經奏設之奉天省高等審判一廳奉天府地方審判一廳奉天府初級審判六廳並各廳內附設之檢察廳需用各印信理合繕單請旨飭下禮部一併鑄發俾資鈐用計奉天省高等審判廳檢察廳印各一顆奉天府地方審判廳檢察廳印各一顆奉天府第一第二第三第四第五第六初級審判廳及檢察廳印各一顆以上共需印信十六顆夏四月中日合辦鴨綠江採木公司章程成

東華錄四月丙子外務部奏光緒三十一年中日兩國全權大臣會議東三省事宜條約第十款內載中國政府允許設一中日本植公司在鴨綠江右岸地方採伐木植至該地段廣狹年限多寡暨公司如何設立並一切合辦章程應另訂詳細合同



總期中日股東利權均攤等語當經奏奉諭旨允准在案三十二年七月日本使臣林權助擬訂鴨綠江木植公司要目函送臣部並請定期會商當經臣部以木植一項關係商民生計應由奉天將軍北洋大臣詳查情形再行核議照覆該使令赴津與北洋大臣就近晤商旋准奉天將軍趙爾巽派員前往該地沿岸詳勘稟覆據稱東邊木植鴨綠兩江並稱繁茂鴨綠江產地較寬而木質比渾江爲遜近水之區所產森林頻年斫伐殆盡至鴨綠江一帶自十八溝至二十四溝方圓約五百里距江較遠斧斤罕到存蓄甚多若劃作公司界限可供二十年採伐渾江與鴨綠江係屬兩事不在合辦之列詎日本林使於三十三年三月到津與臣世凱會議數次卽堅執鴨綠江右岸指該地全段言

之連渾江流域均包在內地域既廣年限尤多經臣世凱將所送提案十一條逐條辯駁迄未就範未幾林使回國代理使臣阿部守太郎送交臣部節略將前擬提案略加改易於地段一層仍包括鴨綠兩江流域及支流在內臣那桐復與迭次會議惟扼定量擴鴨綠江木界而不牽及渾江之宗旨竭力與爭擬改由帽兒山至二十四道溝沿江木植歸公司採伐以距江六十華里爲界以爲最後辦法該代使則仍謂鴨綠江流域須擇帽兒山以上渾江流域須擇通化以上均以分嶺爲界惟白頭山一帶自山頂五十里以內概不採伐此係日本政府深願公司從速成立竭誠擬定讓步已到極處彼此相持幾至無可再議迨十一月間林使回任後復照會申明前議臣等仍與剖辯渾江



奉天通志 卷四十九  
五十一  
流域通化以內不能混爲鴨江右岸之地約內旣指明爲岸則地段之廣狹自應以距岸最近之江心起算該使雖無可駁覆而卒未照允本年二月奉天巡撫唐紹儀奉命來京臣等卽偕同該撫與林使接商前案以此事懸宕經年屢議屢阻所不能就緒者其關鍵祇在該使欲將渾江包括在內若徑行照允則該處木把生業全失必於地方市面大受影響且渾江原設之江浙鐵路木植公司曾係奏准之案尤不能禁其採買計惟有定明渾江森林仍歸中國舊業木把採伐所需款項向公司貸借所採木料歸公司照市價收買庶公司不至壟斷而商業仍得保全遂由該撫另擬提案與林使所交對案按條磋商隨時由臣等悉心參校復與爭持至月餘之久始行定議所訂章程

大綱十三條名爲中日合辦鴨綠江採木公司其地段仍照前議劃定鴨綠江右岸自帽兒山起至二十四道溝止距江面幹流六十里爲界中日兩國各出資本一百五十萬元以二十五年爲限該公司總局設在安東以東邊道爲督辦中日兩國各派理事長一員公司所有進款以餘利百分之五報効中國國家應納木料稅項可商准地方官照章酌減俟此大綱議定後卽由奉天督撫及日本駐奉總領事派員商訂詳細章程俟章程定後限三箇月內卽行開辦該公司開辦後日本政府允將現在鴨綠江之木材廠一概撤去以上各節均經彼此商允無異因林使回國期迫勢難再延由臣那桐會同該使將此項章程互換簽字蓋印以昭信守伏查鴨渾兩江一帶林木蒼鬱確



奉天通志 卷四十九  
五十一  
係絕大利源中日協約既議定兩國合辦鴨綠江右岸木植自應從速訂立章程藉資補救奈日本使臣以鴨江右岸牽引渾江始終固執毫不鬆動臣等亦知於地方生業關係匪輕未肯稍事遷就磋磨至今始克就緒得旨如所議行

### 設東三省電報總局

東華錄五月丁未徐世昌奏擬擇緊要地方先行推廣電綫從新民府起經法庫門遼源州洮南府以達齊齊哈爾共計一千四百餘里估算電桿電料及運費工費等項需銀約四十萬兩至電話一項三十二年經前任將軍趙爾巽檄飭電報局在奉省城廂代爲辦理惟當時限於試辦未能推及於商家應卽仿照京津電話章程徐圖進展以慰商望下郵傳部知之

奏稿宣統二年正月己巳錫良等奏竊查接管卷內光緒三十四年四月間東三省電報總局修設營口至安東電綫業經該局前總辦降補同知黃開文呈准前督臣徐世昌暨郵傳部分別立案辦理在案嗣以鳳凰城距安東僅一百餘里自應一併修通故改名營鳳電綫工程該綫自營口經海城大孤山大東溝安東以達鳳凰城共計綫路七百八十六里從光緒三十四年四月初一日由營口開工至六月二十六日通至鳳凰城全工告竣又宣統元年四月間修設奉臨電綫該綫由奉天省城起經撫順興京通化以達臨江復加入懷仁輯安兩路直達通化爲奉臨之支綫此項工程計自宣統元年四月二十日由奉天省城開工至八月十三日止全工告成綜共綫路一千零八



十里

五月設奉天法政學堂

清實錄五月己丑東三省總督徐世昌等奏遵設奉天法政學堂實行考驗本省官吏下所司知之

奏稿十二月壬戌徐世昌奏奉省原有法政學堂係由仕學館暨旗員仕學館歸併設立

移復州治於瓦房店添設長興州判改興仁縣爲撫順縣

清實錄五月己丑移奉天復州州治於瓦房店於長興島添設州判一員將花椒島所屬興社一社劃歸管轄名曰長興州判移興仁縣治於撫順改爲撫順縣知縣裁原設之路記防禦各員缺從東三省總督徐世昌等請也

東華錄五月己丑徐世昌奏竊查奉天復州地方西南兩面環海海中各島惟距該州一百四十里之長興島巍然獨存該島四面臨海東西約七十里南北約四十里住戶逾二千男女丁口逾一萬五千雖地方稍薄物產不豐而鹽產森林漁業尙可自給地方官向不過問視同甌脫何以保存亟應設官鎮撫擬請添設州判一員卽在該島設治並將附近花椒島所屬興社一社之地劃歸管轄以一事權名曰長興州判卽由臣等慎選堪勝人員前往辦理至復州城治僻在西隅控制諸多不便查瓦房店地方近臨車站商賈駢至交涉日繁實爲復州全境之中權擬請將該州移駐瓦房店俾資策應而免貽誤應行建築衙署及移治各費用卽由臣等督飭核實勘估撙節動用並准



奉天通志 卷四十九  
作正開銷又距奉省九十里之撫順地方商旅增益千金寨煤礦利源日擴該處既無民官愚民無知時滋事端亟應移治鎮撫以資約束而便交涉查奉省分設承德興仁兩縣同城設治殊近複贅擬請將興仁縣移駐撫順必與該處地方有所裨益並擬改爲撫順縣知縣以符名實其建署一切費用亦由臣等督飭實估造銷惟該縣既經移駐撫順從前兩縣所定界址微有區分應另行勘明咨部立案至撫順原設之路記防禦各員等本司催徵租賦緝捕盜賊之事今卽移駐民官自應一併裁撤統歸地方官辦理以專責成得旨著照所請該部知道  
設東三省憲兵學堂及講武堂

清實錄五月丁未東三省總督徐世昌等奏就練兵公所改設憲兵學堂酌擬試辦章程八條又遵章設立講武堂繕具章程三十六條均下部知之  
東華錄五月丁未允徐世昌等奏於東三省設立憲兵學堂又徐世昌等奏設東三省講武堂督員擬訂暫行章程三十六條下部知之

六月設奉天工藝傳習所造甄廠官紙局官牧廠

清實錄六月庚申東三省總督徐世昌等奏奉省設立工藝傳習所暨造甄廠官紙局官牧場以興實業而闢利源下部知之  
奏稿六月壬戌徐世昌等奏前督趙爾巽曾在省城東門外設立工藝傳習所惟房屋狹隘隨就小河沿地內另行建房設局於去年十一月間工竣該所原分雕漆金木織染彩印縫紉等



工分爲八廠迭經釐正改良添設玻璃毛氈刷印顧繡等工廠將原有之染雕金漆各工分附毯木等廠

又六月壬戌徐世昌等奏前督趙爾巽曾就新民府鎮安縣吳家屯地方價領官荒地六萬餘畝設廠購牛兼種兼牧命名曰牧養公司臣等公同商酌將該公司改爲官辦

丈放洮兒河北蒙荒

清實錄六月庚申東三省總督徐世昌奏續放札薩克旗洮兒河北蒙荒請歸入圖什業圖蒙荒一例丈放允之  
奏稿六月壬戌徐世昌等奏哲里木盟札薩克鎮國公業與本旗協理官員議妥擬將洮兒河北沿南北六十里西至札薩克多羅札薩克圖郡王烏泰旗界東至札賚特札薩克多羅貝勒

巴特嗎拉普丹旗界一律續放擬請現辦圖什業圖蒙荒行局一併丈放

秋七月瀋海城縣河道改挑同江口河道

清實錄七月甲午東三省總督徐世昌等奏海城縣三家子石佛寺青天嘴等處河道淤塞水漲淹田請撥款疏濬又奏同江口改挑河道保衛商埠撥款興修均下部知之

奏稿七月甲午徐世昌奏同江口距遼河上游河身彎曲形如懸弧同江商埠適當其背近日河流東徙去埠益遠擬就水勢地勢截彎取直改挑新河另於上游添築順水壩逼水西行以保商埠

又奏海城縣屬西鄉地皆窪下東由虎獐屯西至三家子南由



奉天通志 卷四十九  
大官屯北至青城子縣互七十餘里寬三十餘里可種之地約三十萬畝虎獐屯西接石橋子舊有河道一處迤邐西至三家子順流繞入遼河嗣因年久河道淤塞水無所洩每屆夏令山水暴漲遠近盡成澤國擬請撥款疏濬以興水利又石佛寺青天嘴等處連年水災淹沒耕田多至六七萬畝懇請一律修濬等語

又宣統元年三月乙卯徐世昌奏開挖海城三家子正河共三十餘里計長六千二百三十餘丈又開挖石佛寺青堆子八棵樹古樹子等處河道共七十餘里計長一萬三千七十餘丈又修建石橋間一座石面木橋兩座磚木涵洞十九座

奉省漁業公司改歸商辦

清實錄七月甲午東三省總督徐世昌奏奉省漁業公司改歸商辦另設官局專辦保護事宜以清權限

奏稿七月甲午徐世昌奏奉省漁業公司本係官商合辦臣到任後重訂章程將該公司改歸商辦另設漁業總局專任保護監督之責權限較爲分明並將前領奉天漁業公司兼辦保護事宜關防飭繳查銷另刊奉天漁業總局關防一顆就營口設八局專任保護其原有蓋復海營鳳安錦州莊河五分局仍歸該總局管轄並刊發奉天漁業有限公司圖記一顆發給該公司蓋用

改鑄撫順縣印添鑄復州州判圖記

清實錄七月甲午改鑄撫順縣印信添鑄復州州判鈐記從東



三省總督徐世昌請也

給奉天安東商會關防

清實錄七月丙申給予奉天安東商埠商務總會關防從農工

商部請也

八月設長白府

清實錄八月癸酉東三省總督徐世昌奏奉省東北邊境遼闊交涉日繁擬將劃臨江縣以東長生慶生二保之地及吉林長白山北麓龍岡之後添設府治名曰長白下會議政務處議奏從之

奏稿九月甲午會議政務處奏議覆東三省總督徐世昌奏八月二十日由軍機處鈔交東三省總督徐世昌奏奉省東北邊

境遼闊擬添設府治以固邊防一摺奉硃批會議政務處議奏欽此臣等覆核原奏所稱擬劃臨江縣以東長生慶生二堡之地及吉林長白山北麓龍岡之後添設府治名曰長白駐於十八九道溝間之塔甸等因伏查舊志云長白山在開原城東北千餘里橫亙千里有水南流爲鴨綠江北流爲混同江元史所謂南高麗西北與契丹接壤向爲邊防控扼之區又其地夙多金礦林木之饒曩時興京廳之設臨江縣審得地利之宜倘於該縣東界與吉林府西南界添設府治盛京通志所謂長白之北崇岡疊嶂茂樹深林百餘里土人呼爲訥秦窩集等處適當其地從前坐棄饒沃轉致匪徒出沒緝捕爲難而險要之區守備空虛亦不足以固疆圉今擬添設府治與臨江輯安兩縣聯



絡聲勢呼應靈通計無便於此者應請旨飭下該督所有勘界築署建官駐兵之處速卽籌議具奏將來地闢民聚應否增添領縣均由該督酌量情形隨時奏咨立案至原奏先派設治委員前往辦理如能勝任奏補等情亦與東省近例相符應如所請以重責成

九月設奉天各府廳州縣視學官

清實錄九月甲申東三省總督徐世昌等奏遵設府廳州縣視學官舊有教職擬請停止銓選下部議奏

設奉天調查局

清實錄九月甲申東三省總督徐世昌等奏遵於省城設立調查局派員編纂法制統計事宜以備憲政參考下所司知之

奏稿九月丁亥徐世昌奏光緒三十三年九月十六日奉諭本日憲政編查館奏請飭各省設立調查局等因遵卽查照館章於省城設立調查局一處並刊刻木質關防一顆文曰奉天全省調查局關防查有奏調開缺山西道監察御史張瑞蔭學識淹駭堪以調充總辦

裁錦州副都統缺

清實錄九月甲申裁撤奉天錦州副都統員缺從東三省總督徐世昌請也

奏稿九月丁亥徐世昌奏查錦州副都統秀昌前因降調前署錦州協領薩爾杭阿稟許多款經臣檄派署旗務司司使恩志前往確查業經附片奏明在案茲據逐款呈覆臣詳加核閱其



所控隱匿庫款侵蝕官馬變價加徵草銀侵冒公款驗照索費各節尙非無因其餘均屬誤會誣指屬員稟揭本管長官本干例禁所列各款亦未能盡實此端萬不可開應由臣隨時察看如有不安本分情事卽行從嚴究辦其查明有因各節雖係該副都統咎由自作亦由歷任積弊相沿卽令另簡他員亦恐陋習難除積重莫返此蓋由於職務太簡積弊相仍之所致也案查錦州副都統所轄之錦州義州及寧遠州等四路八邊門地方民旗一切事宜向歸協領城守尉及州縣等稟承將軍辦理自光緒二十八年三十二年先後將錦州官莊衙門大凌河牧羣衙門裁撤該副都統事務更簡不過尋常轉咨之件久無責任可言而廉俸旣薄其所恃以爲挹注者或不免索取規費苛

擾旗丁今奉天改設行省釐定官制意在明定權限各專責成旣設旗務司以爲旗官之統屬而一切公事又皆萃於公署由督撫主持是該副都統旣無主管職務員缺幾同虛設若復長此積弊則於旗務終難整頓而旗民生計亦恐多有阻撓自應將錦州副都統員缺裁撤以祛積弊

裁奉天黑牛館

東華錄九月癸未徐世昌奏裁撤奉省黑牛館另擬辦法允之奏稿九月己丑徐世昌奏查奉天黑牛館共有三處在省城者二一曰黑牛館一曰乳牛館在興京者一曰黑牛館原爲供三陵祭祀需用牛羊而設向歸內務府管理自遭庚子兵燹牛羊被搶一空陸續挑補更難滿足應請將黑牛乳牛二館一律裁



撤由臣遴派專員妥訂章程從新組織兼歸三陵守護大臣管理

冬十一月東三省總督徐世昌奏請設農官

宣統政紀十一月甲午東三省總督徐世昌奏請設農官以興地利奉省自設農事試驗場以來鄉民之來觀者日多應及時別設管理之員查奉省本多旗地而宗室覺羅八旗滿蒙漢子弟及在籍紳士近多就學之人若選擇此項人員作為農官以資任使一以為旗員廣任用之途一以為旗丁授生計之學一舉數善胥由於此下農工商部議

改奉天諮議局為諮議局籌備處

清實錄十一月壬寅徐世昌奏奉省原設諮議局改為諮議局

籌辦處並附設自治研究所情形下所司知之

十二月添鑄奉天各級審檢廳印

清實錄十二月庚申添鑄奉天省高等審判廳高等檢察廳奉天府地方審判廳地方檢察廳第一初級審判廳檢察廳第二初級審判廳檢察廳第三初級審判廳檢察廳第四初級審判廳檢察廳第五初級審判廳檢察廳第六初級審判廳檢察廳等印信從東三省總督徐世昌請也

又十二月庚辰改鑄添鑄奉天承德地方審判廳檢察廳承德第一初級審判廳檢察廳第二初級審判廳檢察廳第三初級審判廳檢察廳撫順地方審判廳檢察廳撫順第一初級審判廳檢察廳印信從東三省總督徐世昌請也



改編奉天巡防隊

清實錄十二月乙丑東三省總督徐世昌奏奉省各軍遵照部頒新章設法裁改按奉省地勢劃分中前左右後五路每路九營計步隊二十一營馬隊二十四營共馬步四十五營統名曰奉天巡防隊自成營起餉後逐漸改按新軍操法訓練以為改編新軍基礎將來添練一營新軍自減去一營舊隊餉不另籌兵歸實用下部議

奉天通志卷四十九

奉天通志卷五十

大事五十

清

清二十四

宣統

宣統元年春正月修奉天模範監獄

奏稿正月癸巳徐世昌奏新修監獄劃分五部一為官舍二為雜居監三為分房監四為工場五為女監及男囚病監定名奉天省模範監獄

徐世昌遷以錫良為東三省總督

宣統政紀正月庚子以東三省總督徐世昌為郵傳部尙書調雲貴總督錫良為欽差大臣東三省總督兼管三省將軍事務清史稿錫良傳宣統元年授欽差大臣調東三省總督



奉天通志 卷五十一  
裁撫順縣典史等官

宣統政紀正月庚戌東三省總督徐世昌奏奉天府屬新設之撫順縣業經設有審判廳一切命盜各犯均由該廳收管請將撫順縣典史裁撤下部知之

奏稿正月丙申徐世昌奏新監成立部定官制既有管獄專官所有奉天府司獄承德興仁兩縣典史皆爲虛職自應裁撤

二月設東三省陸地測量總局

宣統政紀二月庚辰東三省總督徐世昌等奏籌設東三省陸地測量總局以製輿圖而符部章

奏稿二月庚辰徐世昌等奏近年各省測繪學堂次第興起奉吉兩省亦於部章未頒之前在省會分設測繪學堂一所近將

先後畢業擬將畢業學生一百八十餘人暫編測量一隊略倣日本陸地測量部辦法設立陸地測量總局先由吉林入手次江次奉次第測量

設東三省陸海軍圖書館

宣統政紀二月庚辰東三省總督徐世昌等奏籌設陸海軍圖書館以供軍人研究均下部知之

奏稿二月庚辰徐世昌奏擬暫借用前陸軍小學堂東偏房屋先行開辦嗣後如果建築房舍添購圖書自應酌撥官款補助

閏二月裁奉天府司獄醫學正科承德縣典史

宣統政紀閏二月丁未裁奉天府司獄醫學正科承德縣典史

各一從東三省總督徐世昌請也



奉天通志 卷五十一 宣統  
三月設奉天八旗工藝廠及錦州分廠

宣統政紀三月乙卯東三省總督徐世昌奏奉天勸辦八旗工藝廠招集旂籍藝徒設額五百名分木工鐵工陶工藤工漆工染工織工縫工毛工紙工十科並附設講堂授以普通教育懇飭部立案又奏錦州地脈豐腴交通便利擬籌設工廠一處名曰錦州八旗工藝分廠專取旂丁入廠學習定額一百名先就本地所宜暫設氈毯皮革等科與奉天工藝廠聯合辦理均下部知之

奏稿三月乙卯徐世昌奏飭旗務司創辦八旗工藝廠現已勘定省城東邊門草場官地設廠試辦

又奏於錦州城籌設工廠一處名曰錦州八旗工藝分廠現已

購定民房八十餘間於本年二月開辦

裁奉天巡警道

宣統政紀二月庚辰東三省總督徐世昌奏奉省民政既設專司自不應再設巡警道以期統一擬請將奉天巡警道員缺卽行裁撤所有職務統歸民政司兼管下會議政務處議

又三月乙丑會議政務處奏徐世昌原奏稱東三省官制於三省各設民政司而以巡警職掌隸之嗣因外省皆設巡警道而奉省巡警業已徧設故亦請添設巡警道員現在辦理已及兩年漸覺與民政司權限糾紛轉多不便請仍將該道員缺裁撤等語竊維奉省民政既設專司可毋庸再設巡警道缺應卽照准以節糜費而一事權



奉天通志 卷五十一  
添設洮昌及臨長海分巡兵備道

宣統政紀二月庚辰東三省總督徐世昌等奏洮南一府孤懸北荒南隔達爾汗王旂入昌圖之遼源州始達奉境由遼源至洮必先經達爾汗王旂二百餘里始達洮界達爾汗王旂介於洮昌之間橫絕洮南通省之路實爲經營蒙古入手第一障礙南道梗塞則洮南以北之蒙荒終無開通之望而昌圖一府東界吉林又爲胡匪麇集之所遼源者洮昌間之咽喉也控兩府之極端對西北蒙地有高屋建瓴之勢擬請卽於昌圖之遼源州添設道員一缺轄洮南昌圖兩府全屬名曰洮昌等處分巡兵備道

又三月乙丑會議政務處奏徐世昌原奏以奉省北連蒙古南

界朝鮮就邊防控扼之地爲經營鞏固之圖因請於昌圖府之遼源州添設道員一缺轄洮南昌圖兩府全屬名曰洮昌等處分巡兵備道兼管蒙旗事務並劃東邊道東境於興京之臨江縣添設道員一缺轄長白一府海龍府全屬臨江輯安通化三縣名曰臨長海等處分巡兵備道蓋臨長獨據要害雖歷經添設府縣各治而轄地之廣仍較內地倍蓰該督請添設二道員缺一以籌蒙一以防邊均爲扼塞形便之處應如所請辦理改奉錦山海關道爲錦新兵備道東邊道爲興鳳兵備道宣統政紀三月乙丑會議政務處奏徐世昌附片請改奉錦山海關道爲錦新等處兵備道兼山海關監督仍治營口改東邊道爲興鳳等處兵備道仍治安東等因應請一併照准



升興京廳爲府

宣統政紀三月乙丑會議政務處奏徐世昌請升興京廳爲興京府與鳳凰廳同受興鳳道管轄一節查興京內政外交日形重要允宜升爲府治以資控制

奏稿三月乙卯會議政務處奏伏查興京爲周秦肅慎故地唐置燕州明建州衛我朝以發祥重地尊爲興京近復內政外交日形重要允宜升爲府治

添鑄營口新民審檢各廳並改鑄本溪縣巡檢印信

宣統政紀三月乙丑添鑄奉天營口新民地方審判廳檢察廳第一初級審判廳檢察廳印改鑄本溪縣賽馬集巡檢印信從東三省總督徐世昌請也

奏稿三月乙丑徐世昌奏伏查預備立憲年限本年籌辦各級審判廳省城而外先及商埠東省通商各埠以營口爲舊繁而新民一府雖開放較遲而地方寥廓戶口殷繁訟獄之多不亞省治擬於營口設地方審判一廳初級審判一廳新民設地方審判一廳初級審判一廳均附設檢察廳

編奉天憲兵隊

宣統政紀三月丙子東三省總督徐世昌等奏東三省憲兵學堂頭班畢業二百餘名擬編爲四隊分派各處俟二班畢業擬編成三營分駐邊要各地以維軍紀而便糾察下部知之

增設輝南廳醴泉縣以鹿島改隸莊河

宣統政紀三月丙子增設奉天輝南直隸廳醴泉縣改設海防



奉天通志 卷五十一  
直隸廳以鹿島改隸莊河廳管轄從東三省總督徐世昌請也  
奏稿三月丙子徐世昌奏一海龍東南與吉省濛江毗接森林  
叢密從前本係鮮圍間有山田當光緒四年全行放墾乃庚子  
變亂民居焚掠殆盡嗣廳升爲府西北設西豐西安東平等縣  
獨東南一帶猶多伏莽逃戶畏沮不歸臣擬於距府一百里之  
大肚川設一直隸廳以資招撫查海龍共三十六社析其東南  
八社而以窩集河一統河爲府廳之界該廳全境在輝發江之  
南擬名曰輝南直隸廳卽擬遴員試辦此輝南廳設治之實在  
情形也一曰洮南府添設縣治洮南西北本科爾沁右翼圖什  
業圖王蒙旂光緒三十二年始行文放圈放之地縱四百二十  
里橫四十里曾於南北規定兩城基北曰醴泉南曰開化南段

地瘠猶多未放北段地沃墾戶漸稠醴泉鎮在府西北一百八  
十里蒙疆僻遠劫奪時聞商民亟望設官以資衛護臣擬先於  
該鎮設一縣治卽名曰醴泉縣仍隸洮南府統屬業已派員試  
辦此醴泉縣設治之實在情形也一鹿島收隸莊河廳查鹿島  
在鳳莊以南孤懸海中周圍可三十里土著約九十餘戶多仰  
漁業爲生前明崇禎初年卽有居民曾屬金州管轄嗣後聲教  
莫及蹂躪靡所依歸舊年雖繪入鳳屬地圖從未編查戶口倘  
不收隸版圖深恐竟同化外臣檄東邊道就近查勘據稱該島  
人民均由大孤山積年轉徙大孤山者莊河廳所轄之巡檢分  
司也該島距鳳治二百里距莊治一百四十里而距大孤山僅  
二十五里擬卽收歸莊轄並飭該廳加意保護此鹿島收隸莊



奉天通志 卷五十一  
河之實在情形也

設奉天方言肄習所

奏稿三月乙卯徐世昌奏於省城舊有瀋陽書院前圖書館內開方言肄習所一區以英日俄語言文字爲必修科凡在省充差以及候補人員均准各具願書報名入所肄習

夏四月唐紹儀免以程德全署奉天巡撫尋實授

宣統政紀四月癸未以前黑龍江將軍程德全署奉天巡撫

又五月己巳命奉天巡撫唐紹儀著開缺以侍郎候補

按唐紹儀時以

免病

又六月丙戌實授程德全爲奉天巡撫

改設盛京興京黑牛館爲官牛場

奏稿四月壬午徐世昌奏盛京興京兩黑牛館前奏准裁撤從新組織擬請統改名稱曰官牛場省城黑牛館另有乳牛館現合併一處原分設大南邊門外及小河沿等處地窄而窪茲勘北門外距昭陵偏東五里許有餘地二千數百畝最爲相宜擬卽移設此處

裁奉天左右參贊及承宣諮議兩廳

奏稿四月乙巳錫良奏東省現設奉天左參贊一員右參贊一員按照原奏章程左參贊領承宣廳事辦理全省機要事件右參贊領諮議廳事覈議全省章制法令推原設官之意係用總督將來須移駐長春而以左右參贊改爲東三省參贊專受欽差大臣節制同駐長春故吉江兩省但設文案而不設參贊現



奉天通志 卷五十一  
在度支奇絀移駐之議驟難實行而兩廳所管事務強半爲文案之事撥諸東三省官制既未能自爲一律卽查上年總司覈定王大臣奏頒各直省官制通則亦無設立參贊之名大官太多新政所病擬請將左右參贊與承宣諮議兩廳一併裁撤將來總督移駐長春再行酌量添設奉硃批著照所請辦理  
六月增海龍等十三學拔貢額

宣統政紀五月丁卯東三省總督錫良等奏本屆己酉科拔貢海龍新民興京鳳凰鎮安通化懷仁安東寬甸懷德康平奉化綏中各府廳縣未設拔貢定額不能一體與試擬請將海龍等十三學生員設拔貢六名下部議

又六月乙酉添設己酉科拔貢額奉天海龍新民興京鳳凰鎮

安通化懷仁安東寬甸懷德康平奉化綏中各府廳州縣合取  
二名備取二名

添鑄奉天興鳳兵備道關防興京府營口廳印信

宣統政紀六月甲午添鑄奉天興鳳等處分巡兵備道興京府營口直隸廳等關防印信從東三省總督錫良等請也

陞奉天民政使爲從二品

宣統政紀六月己亥東三省總督錫良奏東三省設立督撫原奏程章三省公事皆由督撫聯銜具奏茲查總督現駐奉天吉江兩省距離較遠若一切均須會稿恐多延誤擬請嗣後凡例行之件由該兩省巡撫主稿其關係重要及特別事件或由各該省巡撫主稿咨送覈定或先電商定稿再行繕發以昭慎重



奉天通志 卷五十一  
又奏奉天參贊業已裁撤全省府廳州縣以及佐貳雜職一切  
陞遷調補不可無專司考核之官擬請升民政使爲從二品仿  
各省布政使兼管府廳以下升調補署以裨吏治均如所請行  
修安東縣海關碼頭

宣統政紀六月己亥東三省總督錫良奏奉天安東縣自開商  
埠以來設立海關沿用舊有碼頭約長六十餘丈早經塌陷可  
用者僅三十餘丈且該埠土性浮鬆江流冲刷沿岸逐漸坍塌  
碼頭乃停泊要地非重行修築無以垂久遠而便商旅此項工  
程擬請由安東關稅項下撥用

秋七月濬遼河

清史稿本紀七月癸丑濬遼河

奏稿七月癸丑錫良奏奉省東西遼河自昌圖府之遼源入境  
匯合至通江子而始大由通江達於營口八百里間帆檣銜接  
營口商業於斯爲盛自鐵路告成趨車運者十之七則以遼河  
年久失修日就淤淺舟行愈鈍周咨博訪全河工程計分三段  
一雙台工程二鴨島工程三疏挖冷家口以達營口通江子上  
下游工程三段工程浩大礙難同時並舉應先從雙台子河隄  
入手

改興京同知經歷爲興京府經歷兼司獄事興京教諭爲興京府  
教授

宣統政紀七月己酉東三省總督錫良奏興京廳已改爲府所  
屬教佐各缺亦應升改擬請將舊有興京廳同知經歷管司獄



奉天通志 卷五十一  
事改爲興京府經歷兼司獄事舊有教諭改爲興京府教授並請飭部頒發印信以昭信守如所請行

中日東三省交涉五案條約成

宣統新法令<sup>七</sup> 宣統元年八月二十日明治四十二年九月四日外務部尙書會辦大臣梁敦彥日本特命全權公使伊集院彥吉議訂東三省地方關涉五事宜統新法令第一款中國政府築造新民屯至法庫門鐵路時允與日本政府先行商議第二款中國政府認將大石橋至營口支路爲南滿洲鐵路第三款甲撫順煙台兩處煤礦中國政府認日本政府開採兩處之權乙日本政府承允上開兩處煤礦開採煤斤向中國應納稅丙中國政府承允稅率按他處煤斤最惠之例徵收丁所有礦

界及一切詳細章程另行派員協定第四款安東鐵路沿綫及南滿洲鐵路幹綫沿綫鑛務除撫順烟台外卽應按照光緒三十三年卽明治四十年東省督撫與日本總領事議定大綱由中日兩國人合辦所有細則屆時仍由督撫與日本國總領事商定第五款京奉路展至奉天城根一節日本政府允無異議八月裁奉天府經歷

奏稿八月乙未錫良奏奉天府經歷一缺原係從前府尹所屬京府經歷改設現在奉天省會地方各項政務均分隸於各司道局處所管轄該經歷並無專司職掌形同虛設應請卽行裁撤以節糜費奉硃批吏部知道

九月添鑄奉天交涉司度支司勸業道印信



奉天通志 卷五十一  
宣統政紀九月甲戌添濤奉天交涉司度支司勸業道印信從  
總督錫良請也

冬十月改通化縣八道江巡檢歸臨江縣管轄  
閣抄十月十一日改奉天通化縣八道江巡檢歸臨江縣管轄  
設奉天電燈廠

奏稿十月丁亥錫良奏奉天銀元總局附設電燈廠一所係因  
光緒三十四年五月間奉天停鑄銅元以原有工廠機器廢棄  
可惜改設電燈廠已於本年八月二十二日發光官紳商民頗  
稱利便

修鐵嶺櫻街石橋

奏稿十月丁亥錫良奏查鐵嶺櫻街石橋日久傾圮曾由日本

鐵道株式會社情願備資修理節經飭縣履勘以該橋實在鐵  
道界線以外若由彼修理究非正辦當卽飭由民政司派員勘  
估計需工料小銀元二千八百六十五元係屬動用正款自應  
奏明辦理奉硃批該部知道

添設安東審判廳

宣統政紀十月甲辰東三省總督錫良奏奉省商埠審判廳如  
承德各處均經前督臣徐世昌分別籌設此外安東遼陽鐵嶺  
鳳凰法庫通江六處繁簡各殊情勢互異安東一埠近爲日人  
麇集之地商務尤盛擬查酌地方情形變通辦理先設安東地  
方審判廳第一初級審判廳一所並附設檢察廳分別籌撥經  
費遴委推檢依期開辦以維法律下部知之



又頒鑄奉天安東地方審判廳地方檢察廳第一初級審判廳  
第一初級檢察廳各印信總督錫良請也

十一月東三省總督錫良奏請修錦瓊鐵路

宣統政紀十一月丁巳東三省總督錫良等奏東省大局時勢  
迫蹙借款築路無可緩延況錦愛鐵路直接京奉幹線旁達葫  
蘆島不凍海口內通蒙古要隘外扞黑龍江邊陲形勢極便百  
貨更易流通斷不至於無利可獲至興辦實業應請遵照部摺  
另借鉅款或辦礦務或辦移民開墾有鐵路以爲運輸將來籌  
還本息卽以森林煤礦及墾牧之餘歸償當不至無著用人各  
節臣等更當受其責成又奏此次部議有借款尤須組織銀行  
一語臣等以爲組織銀行應與鐵路離而爲二或於鐵路之外

另立興辦實業借款合同或另向他國銀行借款按年於鹽務  
項下設法籌還庶免流弊伏願飭部從長計議將錦愛鐵路公  
司仍允貸借英美鉅款迅速覆准均下部議

十二月設安圖撫松二縣

宣統政紀十月庚子東三省總督錫良奏奉省東南邊境近接  
韓國從前奉吉省界以臨江爲限奉省與韓分界者向祇鴨綠  
一江自新設長白府治分劃吉省西南以隸奉天於是奉省邊  
境西盡鴨綠東盡圖們中抱松花江處處與韓毗連策邊事者  
遂以長白爲重要地域查長白一府總控三江長白山脈由西  
南直趨東北橫互其中山之西北名曰岡後松花江源出焉山  
之西南名曰岡前鴨綠江源出焉府治居鴨綠江上游背負長



奉天通志 卷五十一  
白山居中控制頗占勝勢然而松江既隔岡後圖們又偏絕東北三江相距各數百里其間林巒錯雜萬壑奔赴危崖峭壁交通未便實有鞭長莫及之勢前督臣徐世昌曾派員分赴松花圖們兩江上源確查詳報臣等一再攷核擬卽於圖們江上源自紅旗以西北循省界南至石乙水中包布爾湖里聖朝發祥之地設一縣缺名曰安圖縣建治於紅旗河西南岸近接韓境以樹國界之大防又岡後之地深林叢薄素爲盜賊出沒淵藪府治岡前防遏韓邊已虞不給勢難兼顧岡後擬卽於松花江上源循下兩省以東上兩江以南盡緊江漫江流域設一縣缺名曰撫松縣建治於下兩江東岸之雙甸子與吉林之濛江縣隔江相望俾靖省界之匪類以上兩縣員缺統歸長白府管轄

一以防邊一以靖內各就天然流域劃疆分治以與長白府相倚角形勢便利無逾於此下會議政務處議

又十二月辛巳會議政務處奏東三省總督奏擬於圖們江上源自紅旗河以西北循省界南至石乙水中抱布爾湖里設一縣缺曰安圖縣建治於紅旗河西南岸又於松花江上源循下兩江以東上兩江以南盡緊江漫江流域設一縣缺曰撫松縣建治於下兩江東岸之雙甸子統歸新設之長白府管轄應如所請以資控制依議行

設奉天八旗滿蒙文學堂八旗女工傳習所

宣統政紀十二月甲申東三省總督錫良等奏清理盛京內務府財政又奏籌設八旗滿蒙文學堂八旗女工傳習所均下部



知之

移輝南廳治於海龍府東南謝家店

閣抄十二月二十日移輝南廳治於海龍東南九十里之謝家店

二年春正月東三省總督錫良奏請籌改全省獄政

宣統政紀正月癸亥東三省總督錫良等奏通籌全省獄政擬請變通成法次第舉辦現擬辦法五事一規定飭建監獄地域一擴充看守所範圍一規定管獄員一籌畫經費一造就獄官下所司議

設安奉鐵路警察局

宣統政紀正月癸亥東三省總督錫良等奏安奉鐵路沿綫一

帶綿亙六百餘里尙無相當警察業經督飭交涉使悉心籌議由省城警局挑選巡警三百八十九名設立總局另設分局四處派出所三十處於去年十二月一律成立所需經費應請作正開銷下部知之

三月裁奉天巡撫

宣統政紀三月癸亥諭內閣奉天巡撫著卽裁撤東三省總督

錫良著管奉天巡撫事

按本月辛酉調程德全爲江蘇巡撫

夏四月設奉天會議行政廳

奏稿四月甲戌朔錫良奏參事一科卽以本署額設參事祕書各幕職員充之審查一科卽以奉省同城司道首府各局所總副理及諮議局常駐議員充之將議案分爲兩項奉旨頒發暨



准部院咨行者爲國家議案由紳民發起關繫公益者爲地方議案

東三省總督錫良奏請修築葫蘆島口岸

宣統政紀四月丙戌東三省總督錫良奏密陳籌辦葫蘆島不凍口岸請飭撥款自築以挽危局下部議

五月收回本溪湖煤礦由中日合辦

宣統政紀五月甲辰東三省總督錫良奏收回奉天本溪湖煤礦作爲中日合辦釘定合同中日各派總辦一人以交涉司爲督辦定股本二百萬圓各出其半中國除地股作三十五萬圓外應籌六十五萬圓其餘一百萬圓卽歸日商擔任將來除股本年息八釐外餘利分作十份以二份五作報効一份作公積

六份五歸中日股東平分其釐金礦稅等項均仿照井陘臨城合同辦理下部知之

裁奉天各司道僉事改同江廳河防同知爲昌圖府分防經歷

宣統政紀五月辛未東三省總督錫良奏奉省各司道均設僉事擬請裁撤並裁同江廳河防同知一缺改設分防經歷一缺如所請行

清史稿本紀五月辛未裁奉天同江廳河防同知

奏稿六月甲戌錫良奏查前督徐世昌奏定東省官制案內各司道均設僉事員缺原以奉省各司道係創設開辦之初事務繁賾故設僉事以資佐理現查館部奏定直省提學司提法司勸業道等官制均無僉事名目自應將奉省原設各司道僉事



員缺裁撤以歸一律又同江廳河防同知一缺由前將軍臣趙爾巽奏設專司緝捕交涉事務查同江本係昌圖府轄境自添設同知並未劃有專治地面凡緝捕事宜係責成防營向歸營務處統轄至重要交涉暨各項新政悉歸昌圖府管理同知一缺幾同虛設應卽裁撤惟同江距昌圖府七十餘里必須設有行政官廳藉資撫治當經檄飭民政使張元奇查明堪以設分防經歷奉硃批著照所請

秋七月改練旗兵一營

宣統政紀七月乙巳東三省總督錫良奏查盛京內外城八旗駐防原設兵額約二萬名餉項約銀四十餘萬兩邇歲餉精照支差操久廢又以庫款支絀旗餉僅照六成並按每年三季折

減發放而旗署辦公復攤公費每兵實領不及原餉之半兵有空名餉無實惠星以近年旗兵出缺皆未挑補積曠兵缺一千餘名如以此項曠餉練改旗兵化無用爲有用擬挑選旗丁照陸軍新制先練步兵一營分駐

拓修奉天文廟

宣統政紀七月庚申拓修奉天省文廟從東三省總督錫良請也

奏稿七月庚申錫良奏奉省文廟自光緒十九年培修後爲時已久漸就頽圯且大成殿僅止三楹其餘堂廡宮祠規制尤極簡陋前經檄飭民政使將應行拓修工程敬謹勘估約共需工料銀八萬餘兩



奉天通志 卷五十一  
修福陵果房等處

宣統政紀七月戊辰福陵果房樓房廚大班房等處年久失修計應修估實工料銀四千六百六十兩請援案發給下所司知之

八月設鎮東縣

宣統政紀八月甲戌添設奉天鎮東縣從東三省總督錫良請也

奏稿八月甲戌錫良奏稱洮南府東北鎮國公旗地處邊要前丈毛荒現時放出者已屬不少升科在即自應由官經徵其未放各荒亦須賡續招墾而現有墾戶半皆客籍尤賴官爲彈壓且外人游歷往來時有交涉事件兼以緝捕盜匪調和蒙漢均

不可無管轄之官吏擬於荒段適中之义干撓地方作爲設治處所該地面積七千三百方里處府城東偏應定名曰鎮東縣隸屬於洮南府

設奉天鹽運使

宣統政紀八月甲午督辦鹽政大臣載澤等奏奉天鹽務雖未建置專官而設場徵課與他省無異擬請設立奉天鹽運使一缺管理東三省產鹽事宜請飭簡放以重職守得旨奉天鹽運使員缺著熊希齡調補

奏稿八月甲午督辦鹽政處奏奉天係產鹽省分擬請規復國初鹽場舊制酌設鹽官並設立奉天鹽運使一缺管理東三省產鹽行鹽事宜



奉天通志 卷五十一  
許盛京尊藏器物陳列展覽

宣統政紀八月乙未東三省總督錫良等奏擬請盛京大內文溯閣前隙地建設博覽館敬將殿閣恭儲器物分別移置其中釐定規章許人觀覽與東西各國設有皇室博覽館用意正同得旨所有尊藏器物准其陳列齊整敬謹瞻仰毋庸另設博覽館名目

九月裁海龍總管

宣統政紀九月甲寅東三省總督錫良奏海龍總管本爲管理圍場而設今既改設府縣明定職守總管已成虛設久無責任應請裁撤原設佐領之下各官有管理兵丁之責均請毋庸裁撤並將兵丁隨時選充地方巡警以期逐漸裁改該處應辦旗

務應卽責成佐領直接公署仍歸旗務處考核辦理筆帖式一員專司冊檔自應一併裁撤如所請行

東三省豫備巡警成立請撥槍枝

宣統政紀九月己巳東三省總督錫良奏東省豫備巡警逐漸成立合計人數約有二三十萬人均須發給槍枝以資操練懇准飭陸軍部迅速全數商訂購運以重武備而濟急需下部妥議具奏

冬十一月設遼陽審判廳

奏稿十一月庚戌錫良奏遼陽州城內設立地方審判廳一第一初級審判廳一各附設檢察廳於本年十一月初一日開庭十二月東三省疫



宣統政紀十二月癸未諭軍機大臣等現在東三省鼠疫流行著預於山海關一帶設局嚴防認真經理毋任傳染內地以衛民生又諭電寄東三省總督錫良等錫良等電奏添設醫院檢疫所經費浩繁請飭度支部在大連稅關撥銀十五萬兩解應急需等語著照所請並著迅速認真籌辦俾得早日消除毋任傳染

清史稿本紀是月東三省疫

又錫良傳未幾防疫事起疫起俄境沿東清鐵路逐處傳染未浹旬蔓延奉吉黑三省嚴起防治三月而疫絕十一國醫士來奉考察開萬國鼠疫研究會於省署錫良主議咸起頌之

三年春二月命奉省各屬商會組織柞蠶絲公會

閣抄二月二十四日錫良奏奉省辦理農林工藝大概情形本省低窪宜稻之區極多遇有淤廢湖灘河荒卽飭設法開濬化荒爲腴本年創立商辦種稻公司民田旣知效法稻田自當日增奉省柞蠶爲出產大宗現飭各屬商會組織柞蠶絲公會研究改良擴充事宜並飭地方官於新添山場嚴加保護不准增收捐項阻其進步省外各屬民間工廠亦逐年增設如商辦之錦縣第一工廠鎮安集義公司彰武東升蠶業公司廣寧工藝局廣裕實業公司遼源蠶業公司義州之實業工廠營口等處之機器榨油廠及官辦之錦縣八旗工藝分廠皆成效卓著而出品尤以錦縣民立工廠所織愛國布最受社會歡迎前由官紳合議在安東蓋平兩處各設一縑絲廠安東廠集股二十萬



商力不足現由官代借十萬補助之明年即可開辦下所司知之

三月裁承德錦二縣知縣並各屬管獄等官

宣統政紀三月辛丑錫良奏昌圖府等七處各級審判廳並開原蓋平本溪三縣城治審判廳均須於本年成立提前趕辦經費驟增亟須騰出的款以資接濟應請將奉天府之承德縣錦州府之錦縣卽行裁併一切事宜均歸該府直轄管理復查審判廳既經成立各屬舊有管獄等官幾同駢枝亦請一併裁撤再各項教職缺分擬請援照吉林成案遇有缺出咨部停選至被裁人員並請查照奉省從前五部司員裁缺辦法有升階者卽行歸入升階班內無升階者卽以本班仍留原省儘先補用

俾得及時自効以免向隅下部知之

清史稿本紀三月辛丑裁奉天承德錦二縣

奏稿三月丁未錫良奏繕具裁撤知縣佐職各缺清單計承德縣知縣一錦縣知縣一新民府經歷兼司獄事一遼陽州吏目一安東縣巡檢管典史事一昌圖府司獄一鳳凰廳經歷兼司獄事一復州吏目一錦縣典史一鐵嶺縣典史一開原縣典史一蓋平縣典史一海城縣典史一興鳳道豐盛庫大使一丈放洮遼站荒

奏稿三月乙巳錫良奏開放洮遼站荒擬由遼源州東北之閭家崴子至哈卜土改三十四里內隨電綫桿除丈留官道十八丈外其餘荒地准予留界又由哈卜土改以北沿電桿爲標準



奉天通志 卷五十一  
西展放一里東推放十九里共寬二十里以符原奏定數計南北長一百四十四里直至郭爾羅斯旗界爲止合毛荒八萬三千零二十晌荒價分爲上中下三等上荒每晌收正價庫平銀六兩六錢中荒收正價庫平銀四兩四錢下荒收正價庫平銀二兩二錢所收荒價作爲十成以五成歸國家以二成五歸札薩克卽達爾漢王以二成五歸多羅郡王隨收一五經費歸局辦公每銀一兩作洋一元七角六年升科地租每晌收中錢六百六十文以三百三十文歸扎薩克以三百三十文歸多羅郡王現擬以十里爲一段每段設一屯分爲十四屯共留屯基十四方以備墾戶建造房舍之用站道自閻家崴子直至四旗分界處逾此界以北卽圖什業圖旗以敦化鎮爲開通遼源適中

之地應先設局安墾未設治以前應暫送遼源州核辦下部知之

錫良病免調趙爾巽爲東三省總督兼管東三省將軍事

宣統政紀三月庚申諭內閣前據錫良電奏疫氣已經撲滅病勢加劇懇准開缺簡員接替等語該督向來辦事認真在東兩年精力勞瘁屢經因病賞假現在防疫事竣東三省總督錫良著准其開缺回旗調理

又授四川總督趙爾巽爲欽差大臣調任東三省總督兼管三省將軍事務

清史稿三月庚申錫良以疾免調趙爾巽爲東三省總督授欽差大臣兼管東三省將軍事



又錫良傳屢稱病乞罷三年始允解任調理

夏五月設東三省審計處及文牘綜核處

閣抄五月設東三省審計處及文牘綜核處

奏稿五月癸亥趙爾巽奏欲實行統一政策必先設立籌備機

關茲暫設立東三省文牘綜核處於奉天公署使之分核三省

公牘以爲統一之預備

又奏東三省公署內擬特設立審計處專司會計檢查三省財

政

裁奉天蒙務倉務二局

閣抄五月二十四日裁奉天蒙務局併其事於行省公署裁倉

務局併入度支司

奏稿五月癸亥趙爾巽奏將奉省蒙務局併於公署至與蒙古王公往來交接事件仍照章以奉天將軍名義直接辦理又省城舊有之倉務局公事甚簡併歸度支司辦理

設東三省屯墾總局

宣統政紀五月辛酉東三省總督趙爾巽奏東三省籌辦實業

擬先從移民墾荒入手現就奉天省城暫設立屯墾總局爲三

省移民開墾總機關下部知之

閏六月裁奉天中江稅局

閣抄閏六月十一日裁奉天中江稅局

秋八月設東三省官報

宣統政紀八月乙未朔設奉天官報援照內閣官報辦理下內



閣知之

秋九月裁錦州府經歷及安東縣太平司巡檢

閣抄九月十三日裁奉天錦州府經歷及安東太平司巡檢

奉天成立保安公會

宣統政紀九月戊子諭電寄東三省總督趙爾巽據電稱日前創設保安公會情勢洶洶幸標統聶汝清等仗義執言竟挽狂瀾本會現已成立秩序尚無騷動

又諭電寄趙爾巽兩電均悉本省成立保安大會專以保安地方尊重人道爲主辦理甚是現在時事艱危該督夙秉公忠正資倚任務當勉爲其難力顧大局所請罷斥之處著毋庸議

奉天通志卷五十





